

明張文忠公全集

明張文忠公全集

本傳

周聖楷楚寶

增錄二

張居正字叔大江陵人母趙氏嘗夜見室中有光上照天頃之一青衣童子自天下繞牀左右遂娠凡十有二月生少名白圭穎敏絕倫十二爲諸生就郡試時大司徒李公士翱爲郡守先有異徵奇其狀更名居正尙書顧公璘撫楚行部大奇之語監試直指使者張孺子將相器也宜老其才卽見其名姑乙之及啟卷果售直指因用顧公言乃置之次日爲特設鹿鳴慰勞焉庚子舉於鄉謁謝璘璘猶以爲早因解所繫犀帶以贈曰爲若異時圍腰飾然若且玉不足久溷也丁未

舉進士選庶吉士己酉授翰林院編修時少師徐階在政府見公沈毅淵重深相期許甲寅請告歸則卜築小湖山中終日閉關不啟人無所得望見久之益博極載籍通當世之務庚申以右春坊中允管國子監司業事甲子重修興都志成進右諭德爲裕邸日講官每進講必引經執義廣譬曲喻詞極剴切莊皇帝往往屬目加禮焉隆慶元年累進禮部尙書兼武英殿大學士公之入閣同時閣臣皆折節從容公班最後獨謂輔相體尊當自嚴重時倨見九卿他亦無所私款洽而閒出一語輒中的人以是愈畏憚之重於他相矣當世廟末政多偷玩事無統紀舉朝務爲繁言鮮實效詔令屢下多

廢格不行是以上下相蒙名與實爽又國用空乏督賦之使
四出民苦搜括而寇數犯塞京師武備久弛乃條上六事省
議論振紀綱重詔令覈名實固邦本飭武備因請舉祖宗大
閱禮上嘉納己巳之冬遂大閱於北郊公戎服扈從天子坐
武帳躬擐甲胄觀將士爲偃月五花之陣已乃閱騎射簡車
徒人已知爲救時相焉四年庚午用三年考績恩加太子太
傅吏部尙書官一子中書舍人先是北寇俺答最彊盛肅皇
帝時歲入邊殺略吏民畜產甚眾雲中遼東尤甚其後我叛
人趙全與其黨李自馨等亡抵俺答居板升擁勝兵數萬而
中國亡命又悉往從寇熟知險隘阨塞爲寇鄉導日夜教寇

候利害處以故二十九年俺答大舉逼京師四十九年犯薊
隆慶元年陷石州會其孫把漢那吉郤於寇與其妻比吉等
十餘騎來款關督撫王崇古上狀朝議以爲納叛啟釁非宜
不然宜殺之公獨勸上納那吉降安置大同城中厚給飲食
衣服供帳器具以市之俺答聞那吉亡大驚發萬騎臨平虜
城來索廷臣恒懼公令諸將堅壁清野勿與戰使那吉衣所
賜緋衣金帶誇示寇使而陰遣謀者以好語款寇曰若能縛
我叛人趙全等獻約稱臣守邊乃得歸而孫時崇古謂寇久
不去老師費財欲乘老酋得孫急而因與爲市公與書曰和
戎自有體彼卽欲得孫謂宜先縛致全等境上盡屏往來游

騎請命幕府我乃禮那吉而歸之耳今擁萬騎平虜城外欲
坐索而孫何可謂誠款乎夫全等至狡獪彼豈能坐而待縛
若雞犬乎假令語泄彼得爲謀或聊以脅從數人欺誤朝廷
而我乃棄重質非細故矣且那吉歸而老酋幸奉約束無他
吾卽假爵封王通貢市可矣有如寇諸所言特空紿幕府殊
無意稱臣又多所請乞明年又復寇邊損國家威重則雖
得全等數百輩何爲於是崇古遣使一再詣寇營曉以利害
堅其約俺答仰天笑曰吾何愛數十人不以易吾孫乃夜襲
板升得趙全等九人縛致境上命厚禮那吉遣歸俺答感泣
遂稱臣內屬求通貢市歲歲勿絕上命磔全等東市傳首於

邊全驍黠甚顧其屬曰吾屬死邊事甯矣上嘉公殊勳加少保兼建極殿大學士官一子尚寶丞而詔集朝臣詣闕下議封貢可否眾士藉藉公復以書抵崇古言封貢有五利邊鄙不驚稽人成功一也我得以其閒養士馬修戰守備歲無調援可省行糧數十百萬二也俺酋旣臣屬土蠻吉能不敢輕動三也趙全等旣禽卽板升數萬之眾知寇不足恃可馴而致四也寇驕天亡其兆已見老酋死族必分不死必有冒頓呼韓之變我得乘其敗而坐困之五也乃復詣文華殿舉成祖封和甯太平賢義三王故事告上上意遂決許通貢市封俺答爲順義王俺答大喜已而套寇亦願修貢市易如宣大

例自是中國以段布皮物市寇馬寇亦利漢財物貿易不絕
居庸以西五千餘里無烽火警天子無西顧憂得一意備東
寇矣上念公運籌制寇茂著忠猷加少師兼太子太師予一
子錦衣衛正千戶世其官六年五月上不豫召輔臣至御前
受顧命公伏地號泣不能起神宗嗣位詔公卜視大行皇帝
陵寢比歸而首輔拱已去位矣公爲首輔召見平臺慰勞懇
至初上在東宮嘗晝寢夢一美髯大臣在側若將有所陳見
寤而異之以問左右對曰殿下他日當有太平宰相如其人
及見公長身玉立髭髯修美上憶夢中事特賜金幣及繡蟒
斗牛服公頓首泣謝因疏請大誥文武羣臣示上意所嚮百

僚寢寢振動矣又念國有大故或啟戎心請勅本兵令邊吏
毋得解甲謹備寇又按劉文靖故事請御日講三日一出視
朝毋以寒暄小故廢罷山陵禮成進左柱國兼中極殿大學
士官一子累疏辭免上復親灑宸翰賜大字凡五日元良曰
良臣曰爾惟鹽梅曰汝作舟楫曰宅揆保衡公頓首曰上幸
嚮意文字卽操觚染翰非帝王要務亦無不究極精微動以
古人爲法臣知所以事上矣乃采古帝王善可爲法者八十
一事惡可爲戒者三十六事以應陰陽之數繪爲帝鑑圖說
以獻上起敬受令宣付史館萬厯元年癸酉有王大臣之獄
一時洶洶禍及舊輔高拱公以百口保其無他事乃解嶺東

平上將首論籌策功謝不受上言臣當先帝時上便宜六事
其一願上綜覈名實乃當事者玩歲愒月卒不能以實應卽
敷奏徒文具耳請令自今天下吏民所上封事有事下四方
郡國者諸曹置記籍與爲期約月令科臣按之設所在撫按
皆奉行詔書不以時奏報或以奏報而諸曹故慢令無可否
者臣等當條列其事請詔下所司詰問責令對狀上報可十
一月以六年考績進中極殿大學士二年甲戌西南夷都蠻
平都蠻古瀘戎也數剽掠蜀郡公推轂曾省吾撫四川以劉
顯爲總兵征之是時言官論顯閫事罪且不貸公曰臨敵易
將兵家所忌卒不罷顯顯竟就功公以上方精核吏治乃與

太宰張瀚大司馬譚綸奏上御屏中繪天下疆域左文右武
各列職名上命設於文華殿省覽又請修祖宗故事令日講
官記注起居兼錄詔諭制勅凡郊廟耕藉幸學大閱皆令侍
從又選史官六人居館局中編摩諸司章奏其大臣便殿獨
對有密勿謀議得聞史臣者令入對大臣紀述送史局詮次
爲異日國史原本四年正月御史劉臺劾奏公臺故公所取
士也出按遼東遼捷御史不當報而臺違例報公以故事裁
抑之臺怒遂抗章極論公黜橫十餘事公上疏乞休上慰畱
之廷杖臺公復申救竟從寬貸六月重修大明會典是時歲
比不登又多水旱上詔書數下賜民田租而郡國奉行不勤

督賦益急閭里愁歎盜賊竊發乃請詔責有司加意牧養令
主計議佐百姓民有窮餓或歲大祲若逋久賦重度不能輸
將者其悉除之又言太倉所儲足支八年獨大帑無羨金而
民間復苦輸粟終歲勤動不得休暇上下交病矣請令今歲
賜民改折十之三實公帑寬民力真兩利之道上從之亡何
以一品九年考績加特進左柱國進太傅支伯俸官一子尙
寶丞于常典外賚賜有加累疏辭謝許辭太傅伯祿五年丁
丑三月廷試賜公子嗣修及第第二人有詔修慈慶慈甯宮
公上言兩宮規制甚備又至壯麗足以娛太后萬壽不宜時
絀舉羸上卽入言聖母得罷之六月嶺西羅旁平以其地置

郡縣公舉兵部侍郎凌雲翼力也公爲政大約以尊主權課吏職信賞罰一號令萬里之外朝下而夕奉行尤畱心邊事有本鎮將吏不知而公別偵之以告者人亦不測其繇是以羣臣恐恐然救過惟謹職事釐舉無敢飾非枝梧者居恒謂高皇帝眞得聖人之威者也世宗能得其意故高臥法宮之中朝委裘而天下不亂以大阿不下授也于時政體大肅而漸有不便于公者矣九月父文明卒于江陵計聞累乞守制不允是時彗出斗牛間尾指婺長數十丈臺官微言按天官書斗丞相之位彗出斗牛女主大臣移徙天子愁兵起天下受怨于是上畱公益堅至于流涕公又以母老疏請極哀切

上乃命司禮監差官一員同公子嗣修馳驛歸營葬卽迎母來京侍養公感殊恩慨然遵諭暫畱疏乞辭俸守制預允歸葬從之十月杖編修吳中行檢討趙用賢刑部員外艾穆主事沈思孝于朝復杖刑部觀政進士鄒元標五人皆以疏諫奪情自是怨公者益甚公皆身任之卽以是稍除異已者不恤也六年三月大婚禮成再疏乞歸葬上不得已勅璽卿金吾護歸以三月爲期葬畢卽上道又特頒帝賚忠良銀印記一如先朝楊士奇張孚敬例得密封言事仍戒內閣臣調陽等有大事毋得專決仍馳驛之江陵聽先生處分瀕行入辭便殿上爲嗚咽流涕入言聖母聖母亦感痛所以慰賜祖送

有加以旣歸襄事訖奉旨敦迫還朝召見文華殿西室問所過
民閒疾苦及北寇衰敗狀公對甚悉上大悅先是肅皇帝時
公族繁盛國用困竭禮官所裁宗藩條例多刻意抑損且乖
牾不可訓公乃略舉事例未安者十餘事請勅禮官集羣臣
定議著爲令甲昭示諸侯王諸王有見而感泣者七年二月
河工成自河決崔鎮呂泗淮陽諸郡悉爲巨浸瀕河郡縣治
隄費且萬萬廷議迄無成上以問執政公因言故河道御史
潘季馴可使乃降璽書卽其家拜都御史一切假以便宜踰
年工成上漸備六宮太倉所儲金錢多所宣進公因戶部進
御覽數目陳言萬厯五年歲入四百三十五萬餘兩而六年

所入僅三百五十萬餘金五年歲出三百四十九萬餘金而六年所出乃至三百八十八萬餘金夫歲出則浮于前歲入則損于舊不可不知也王制量入爲出三年必有一年之積而後可以待非常之事無匱乏之虞設法巧取不能增多惟加意撙節則用自足願將主計所上疏置座隅時賜省覽又上傳旨工部置錢應用公亦以利不勝費止之言官請停織造不聽公面委曲以請得省數之大半復請停修武英殿工及裁省外戚遷官恩數上多曲從之十一月詔度民田高皇帝時天下土田八百五十萬頃至宏治十五年已減二十七萬歲久滋僞弊孔百出有所謂飛詭者影射者養號者掛虛

者過都者受獻者久久相沿豪民有田無糧窮民攤派受病
矣民窮逃亡勢又不得不請減額而國課日以益虧公請料
田凡莊田屯田民田職田蕩地牧地皆就疆理無有隱奸貧
民不至獨困豪民不能兼并又民間新所墾治皆賦其貢稅
以新賦均舊額則國初故額不失而民賦以輕其撓法者皆
下明詔切責天下奉行廩廩焉八年庚辰服除詔加太傅歲
加祿米百石晉前所予錦衣衛正千戶世指揮僉事公辭太
傅尋以大禮畢成聖德日茂拜疏乞休上諭懇切最後手書
傳慈聖諭張先生受先帝付託自今以往輔爾至三十而後
商處願今無復出口矣遂不辭三月廷試賜公子懋修進士